

O dayori loshanwla akana. I bendyoola. Poshninwla tw rool. Awla lakoro rom. Phwrdilw butoro zlatos. O day asala i phwla:

– Nay so tw dikhws! Zha lw o hwrws ta lw chuvalentsa kavka zlatos. I tw zhas tw prigotvinws amwn, chi amw kw avas amwngw.

Golo, khwra barw kwrdes. Akala phwnendar veche po lachhws kw zhivwl. I akala phwne phwnwna:

– Sai buti achhili akana? Amw ulem o barvalw o chorwn na dinem. Akana amw o barvalw kw achhovas slugws o chorwskw. Sai achhili keyka buti?

Kavka shundes veche, akava shundes. Shundw chi o chhay bendili. zhwtitsws mukwla. Brey, sar tw izmaystorinwn akana o duy phwne akala o tsikne! O phwnn phwla o barw phwnekw:

Tswka i tswka o buti. Shundem chi isila chhay, katw roola – zhwtitsws chhadwla, katw phirwla – rozws mukwla. Oy si azhay tsikori i azhay nanay belli. O zlatskw tw chas tw dikhas.

Tsidindw. Gwlw i o phwnori, o tsikni, phwla:

– Lachhws chi alw ta tw mazhiwn tw kwrwn..., tw chuviwn mangw o tsikore, mw tw zhav tw phwraw panori tw nanerav la.

Pala o tsikori soola.

– Hem tw kwras amwngw habw, tw gotvinas amwngw.

– E, nool mi phwn, nool. Vwrinw.

Lwl pws, gwli. O phwne lwna o chhoore sar soola ko kuna – pras, pras, pras shamare I o tsikori runi. Phwrdw pw bwrkha, pw zhwbws zlatosa, zhwtitswntsa. Tsidindes... Awla o phwn, zabutiwla o kuna i phwla:

– So mi phwn?

Kanato tw achhyol nuzhda tw awn o phwn... I gwlww pwskw kulka. Razshunerdw, chi deystvitelno si seyka o buti. I ot den na den o chhay zabarili, zaphirdes, zakhandindw daka palllate. I achhyola veche bekerka prandwmaskw. Shunwla o tsareskoro raklo. Li akala phwnwn isi duy zhuvles.

Lwla pws, zhala pash o tsaris mukwla molba. Gwlchinwna halkengw tw khwdindzhovwn, tw zhan tw mangwn la. I kuyka shundes. Tswka i tswka shundes, lachhi chhayori si, tw zhan tw mangwn la lwskw romnekw. O dayori, nali krotichko o chheekiri day, oshte ot edna duma dwla pw chhee ko tsareskoro raklo.

Prigotvinwna borikano..., prigotvinwna faytoni, prigotvinwna veche so isi habnaskw. O day thoola pw chheekw maro, thoola pw chheekw pani. O drom baro, tw bokhalyovwla, tw mangwl tw hal, tw dwn la. I kwrdes.